

列聖御製

七

文宗

5241.49
1122
1814
v.8

BERKELEY
LIBRARY
UNIVERSITY OF
CALIFORNIA

芳二十二

Carpentier

列聖御製目錄

卷之五十

正宗大王文

卷之五十一

正宗大王文

懷素草書



列聖御製卷之五十

正宗大王

文

月山大君

悼

墓致祭文

己酉


振振公子若麟之定園林鐘鼓際時熾盛戩穀其
終為我貴宗虔揭有祠捐出大農肅予以過拜
陵前夕醑旨燕馨冥冥者格

洪奉朝賀

鳳漢

墓致祭文

昔酹公墓于丁未秋轉眄跡陳星霜幾周是日重
過愴望松楸舅氏迎途我思悠悠有洞茲觴尚庶



歆休

翼成公黃喜墓致祭文

揭揭翼成咎夔者匹王戚朱紘有煌黼黻泰山不
動功利及民何處得來展如之人輦路西出云過
墓門靈其顧歆我酒崇尊

忠愍公李健命墓致祭文

卿於四忠其死愈寃予讀遺集判欲無言惟彼交
原尚有碧瘞先王之思泫然我涕駐蹕茲鄉矧
望松楸何以瀉懷有馨斯烝

弘陵忌辰親祭文

東方任姒寔維 聖后四紀 母臨一念慈覆愛
洽 貳極恩暨寡躬曰予元孫壬申生同載抱載
提朱芾盈尺祈我萬壽錫我百祿丁年以前和氣
融融欲識往事仰質 慈宮祗拜 永寢路過象
設回鑾其夕又值 諱日嗚呼可謖幽顯豈隔宿
齋蠲饒有淚沾臆

先正文成公李珣墓致祭文

坡山峩峩百世仰止展也文成左海夫子擊蒙遺
草曩予弁卷駐駕替奠罍豆餞餞

先正文簡公成渾墓致祭文

天降大儒絕學始明文成竝世若周暨程江山文藻尚有故宅路過之夕倅官侑爵

和平貴主墓致祭文

瞻彼馬山貴主攸藏惟己之甲禮伸替觴緬仰今昔予懷增傷欲說往事涕先淋浪爰命騎貳遙辨心香

洪慕堂

履祥

墓致祭文

外氏赫葉公實始之一代名高百世蔭垂昔見公集今過公祠思公者深酌以洞卮

儒川君淝致祭文

派分金枝慶毓銀潢屬尊望隆公族之良 聖朝
加禮同朝稱賢矧惟敕功翼瘳之辰才能旁通誠
竭所知忠僖義謚名不實浮餘庥靡忒在今子孫
璿籍纔離科甲已闡念勞展親罔非起感忝官薦
酌庶幾來監

洛豐君楸致祭文

蟬聯寶胄源遠流長世襲封典藩我家邦敦親合
族 列朝所修卿在宗英屢荷恩庥榮慣羽衛任
重星輶殫誠盡職茂著勤勞積慶之報不遲不僭
雲仍寔繁金榜高占予懋乃績曰篤不忘觸境興

恩替致辨香

長溪君棟郡夫人尹氏致祭文

予昔觀卿尚記典刑志謙而下貌癯而清為我宗
老事我 寧王害險害夷徃哉惟卿每念賢勞特
異眷遇施及夫人責效肺腑 兩朝舟梁一心殫
竭外內積伐理應醅醢今焉有喜花結孫枝勗躬
燾後歆茲賀卮

文清公徐志修致祭文

粵予受學卿實甘盤爰暨南朴左右輸丹已卯宮
筵恍如隔晨卿孫闡甲喬木回春六世之間四魁

三相清白傳聲弊廬無恙因子叙父為我諭善故
家新榮復隨冠冕恩酹之典豈俟踰日文又親綴
尚歆芬苾

王洞書院宣額時致祭文

大嶺橫霄屹如巨人迤為道溪院枕于濱翼成之
享爰得其地顯顯翼成東國之紀訐謨遠猷 英
陵有臣山嶽功利布帛經綸史有特書闢異之力
凡我嶺人於茲考德少尹舊居昔所筇屨特宣恩
額聳夫一路曩過畿西仟酹墓丘餘思寄意洛江
悠悠

恩信君禎致祭文

凡今之人孰無兄弟而予於汝欲言先涕哀哀風
樹慟又滄桑瘴海旅魂幾遭星霜予心昨悲儻汝
知否辭豈罄懷尚歆斯旨

宣禧宮修改告由文

藻井有漏瓦缺其鱗禮宜亟改告儀先申

宣禧宮修改後還安祭文

葺之不日風雨攸除都尉來裡靈其永豫

延齡君

明

祠宇親臨奠酌文

肅考在宥公維麟趾猗我先朝友于篤至緬惟

微聞予思悠悠是日輦過有觴其觥

恩信君禋祠宇親臨奠酌文

閱歷險巇疇若予偏中間事故吞不復宣生者莫
庇逝爾忍忘而碑而謚祗增悲傷遺祠入望恍予
汝覲十數年懷瀉此一酌

和平貴主祠宇親臨奠酌文

曷不賢淑我姑伯仲綽楔表烈芬苾紆慟一體崇
報匪直親親戊年以前功著彌綸嗟天畲壽在國
不幸每見都尉語到輒哽輦過沁園芳躅如舊坡
山餘耿躬奠茲卣

宗廟告由文

修繕之工是日諫吉謹將事由先告 各室

宗廟儀物修改告由文

維巾維帷維褥維茵繕改將始告儀虔申

明川府漂壓民人等設祭文

咨爾冬春若將填溝拯斯勤斯卒乃望秋昔飢伊
蘇賴天孔仁今雨之災厥咎一人祝爾甌窶滌爾
圃場一曙滄桑魂隨漂蕩哀此無辜怛焉何及爾
有孤寡惟予賙急爾無棺衾惟予掩骼念其餒而
以侑爾醉

園號議定啓 園擇日後 景慕宮告由文

移卜吉岡載揚新號啓 園在即庸申兼告

舊園所祠后土文

禮舉遷奉天與吉宅啓 園洎吉經始在即為申

厥由佻來薦酌

舊園所始役時親祭文

進蠲靈辰載始工事莫攀之思來將茲解

水原新邑鄉校位版奉安告由文

肇卜 先寢在花山阡民社改治校宮隨遷作之

八達功奏吉洎妥以牲醴兩楹依然啓我斯文永

賴萬年

遷園時社稷祈晴祭文

謹諏令辰載戒廡衛晴而暘兮敢徼神惠

園所移奉所過名山大川設祭文

華嶽三峯鎮我邦國告儀居先寔庇神力

右三角山

為朝為對夙祈嘉貺曷以貺之利于攸往

右清涼山

昔登拜峯以望嵯峨肝應如初
勒蹕穩過

右嵯峨山

巨橋跨川其直如矢肅奉 廟衛神庶勞止

右箭橋川

虹梯浮空大江揚靈穆將虔愉輶路以寧

右纛島

清溪之山上有靈井式徽神庇旌翼蔭境

右清溪山

冠于衆岳珠臺矗矗戒道之初牲酒以告

右冠岳山

牛川訐訐功配于瀆濟斯靈斯禋薦孔夙

右牛眠川

洛山周遭巖巖其峙永祈呵護用享明祀

右慕洛山

山名華蟲其文炳蔚以侑以告是日相紼

右雉岳山

鼇梁告成 龍輶載啓利涉之祝大斗崇醴

右鼇沐川

迺卜吉岡光教為宗龍翥鳳舞千里一逢神監人

願永衛 玄封

右光教山

天作花山大地福龍龍盤弄珠元氣重重何天之

龍卜茲新 園拱衛餘庥維萬子孫

右花山

安園奠祝文

龍盤珠丘萬年之宅象設告完替奠明酌

靖敏公鄭弘淳致祭文

曰惟萊州我國山東卿承令緒八世九公理我財
賦壯我藩翰進于鼎鼐具僚懾懾萬馬奔馳孤立
骭黷莅事則敏聽言則謹自輟秦卷每睠殷羹時
維十月有事 仙瑩將奉 玄宮予心其灼技血
載觀差慰臆塞木理如膩漆光可鑑卿於疇昔治

裨是監東園裁端眎予無憾尤何為懷即事銘感
草宿湖阡日月流轉恨不起卿稱謝以面曷云酬
報庇子陞郡爰命知申又薦芳醞

提督李公如松廟致祭文

維 崇禎紀元後百六十二年歲次己酉十二月
壬子朔十一日壬戌朝鮮國王謹遣臣敢昭告于
有明上柱國光祿大夫提督遼薊保定山東等處
防海禦倭軍務總兵官中軍都督府左都督太子
少保贈寧遠伯謚忠烈李公伏以昔公來思東人
稽首稽首曰咨大邦父母公來不疾我不圖存我

公之惠我翰我藩維時公年纔逾強仕舊甲四屆
月維十二滿天風雪遼薊莽蒼巫陽廣招邀矣遐
荒雲旂霞輪有無冉冉怒氣壹鬱光恠如劒如劒
如畫志士眦裂陰陽消息是日何日介冑駿奔鼉
鼓殷殷大酒以醑稽首東人東人曰咨欲報之德
年年是日家尸戶祝公靈在東壯我山河福我壽
我受言孔多謹以牲醴庶品式陳明薦尚饗

宣武祠致祭文

往者狡奴既劒而熾天戈再援賴我經理于以仗
之煌煌金鉞誓衆之辰鯨鯢遠逸哆兮貝錦公不

少留凡東之人淚墮螭頭時節致虔匪直也功千載在後庇我大東

右楊經理鎬

天兵東出有將如雲時維司馬掌轄諸軍若唐征淮咸統于弘席卷之勢獨任奇功赫赫寧遠微公孰殿烏乎神京滄桑百變歸然遺祠一體楊公酌以大斗如挹英風

右邢尚書玠

環東一域皆神皇賜神皇之思及從征士戟鬚電眸想像酣戰左右二公來饗殷薦

右征東官軍

鎮安大君

芳雨

修墓建碑日致祭文

緊惟我公

太祖長胤在家而孝為臣也蓋義旅

西回匹馬東徂北山故里即泰伯吳欲狀至德穆
如清風公之幽阡自咸而豐密邇 二陵洋洋在

傍幾百星霜莫辨斧堂大水云齧片石如舊題曰

公墓若迨神佑築斯禁斯爰準邦典伐石紀實手

寫躬撰

列聖志事小子適追雲孫縻爵矧在此

時選吉肇工閱月告畢近臣將命恭蕝芬苾

清權祠宣額日致祭文

有周泰雍民無能名後千百年我家二寧曠世尚
感矧我本支逃禪避世公跡愈奇 聖祖因心禮
敦家人江亭喜雨 天笑為新積慶宜後不顯亦
世凡今璿潢半是公裔果州之祠芬苾永傳何以
象德曰清與權斷簡猶徵盟讀紫欵吉日宣額近
侍奠觶

至德祠致祭文

昔我 肅祖元年乙卯命立大君廟於城南至翼
秋役告成稱祠號曰至德予小子踐阼之十有三
年冬十二月庚辰追 先志宣額是日遣近侍嘉

善大夫行承政院左承旨洪明浩侑祭于讓寧大
君之靈其文若曰我家肇初時有鎮安公之至德
又處其難神人有託天降 聖王公乃讓德臂蒼
牽黃謂自樂此聊以卒身爰及孝寧行夷齊倫猗
我 英陵因心有聲樓聯華萼不粵不荆王兄佛
兄跡隨語竒匪直也讓磊磊其姿小子紀述其辭
十行俛仰起想金扁煌煌祭以告之靈斯歆斯香
火千秋清風襲楣

昌嬪墓致祭文

庚戌

彼窈窕原瑞色雲擁松柏固抵左右森拱地似藍

田羣王種種展懿 昌嬪衣履是奉長發厥祥源
流瓊涌璿潢銀泓 宗國永鞏垂庥无疆用光策
冢弗祿攸覃報禮乃重曰予駕過緬挹蒼輦雲孫
奠筭若予躬捧

領議政鄭太和墓致祭文

我家碩輔輒推翼憲卅載鐘鼎內德以獻小人是
懷君子是勸為臯為夔勛華之願譬如甘雨肇厥
膚寸暨乎霽霈潤物齊萬遂將戔帛廣招隱遜華
陽老子式歸一園勲輕崇璟祿逾奮建盛宋樂府
喬木美蔓子孫攸繩聲施及遠睠我水城曰有𠵽

論龍騰鳳翥坐癸枕艮卜茲一珠丘孔林春健先
見之明若驗左券變彼曲儒敢窺藩溷嚶嚶我思
不忘每飯南充古縣曩予止頓玄封入眎山回水
曼靈應不昧尚歆馨膺

毓祥宮酌獻禮祭文

於穆 寢宮肅將春覲星周大常舊甲是趨仰惟
昔日我思孔長潔服蠲辰式陳肴觴不日降監載
錫之祥

三聖祠重修祭文

曰若稽古三聖于東始有君長廼拓鴻蒙彼樹之

檀光啓無窮都於唐莊竝堯宅中歲積一千玄化
匹隆越瞻西岳有覺新宮 寧考之祝惠于神功

商山君李敏道墓致祭文

聖祖龍興䟽附如雲允矣商山厥為元勲隴西餘
風渤澥以東威化回旗全我降衷山河載誓鼎彝
旌寵豐州之麓蓋有其塚灌莽蔽幽且二百年始
晦而顯若有相然廼伐穹石樹之玄扃式取丹書
龜頭著銘咨汝觀察潔蠲一酌拱衛京闕氣壯嵩
泰

錦城都尉朴明源成服日致祭文

嗚呼我公曷不憇遺公歸廼遽予將尤誰神乎忍
此匪直也私竊聽輿人尚亦齋咨蹟公平生子維
公知公賓我家先王命之秦樓沁園龍光陸離
孰夸而靡罔戒堂垂我則晏晏謙抑自持出屏髹
輶居不華棖先王曰嘉終始無疵亦我令姑室
家之宜隻手撐天人無間斯忍說戊辰綴旒之危
女史彤管千秋有辭縱今廢絃若初結縞承安
丙枕必告于祠殆四十年不余神欺是謂篤倫維
德之基基於行源餘力以推手占先兆誠感灼龜
遂長已見直駕老師睠我園寢公乃析疑若龍

含珠天寶我貽地既叶吉冥庥至滋維公是相是
度是諮永惟偉功酬言無期帑帛以綖臨書封碑
一字一噫悠悠我思昔公在世滄桑屢移人所難
處我如何其略無幾微撕得眼眉即其外著粹溫
貞夷叩其內蘊繩尺槩規展如之人遐福不禔耿
彼孤蘭茁茂榮時栽培成就予言在茲斜枝雖繁
蔭畝難裨公焉已矣我涕漣沔英爽不沫尚傾我
卮

判中樞府事李性源致祭文

忍忘賢哥欲覲難更卿又逝止無奈乎命孰作席

珍孰替人鏡中朝之思坐夜將竟不食有報剝果
復盛茲遣卿從姪閣臣李晚秀侑以祭之于故大
匡輔國崇祿大夫判中樞府事原任內閣提學李
性源之靈靈其歆斯

琴湖書院宣額日致祭文

四朝贊治皤皤黃髮柱石二字袞華垂緯久道化
成普施無止若姚若宋有孫有子爰就琴湖扁于
祠楣亶由曠感尚歆茲庀

文簡公金淨祠致祭文

大湖以南特挺文簡行篤躬踐理契體撰鏘鏘王

珮克紹編刻譬之上垂花開葉產尺疏扶倫千古
隻眼陰陽以類若坎離限孰夸而變擋我手版城
復于隍志士裂睥蹟其平生懿不可揀廟而弗桃
永享醴醎

壯勇營旗祭文

自西自東自南自北注乃精神以颭以摩以指以
揮聽我節度旗之為用也大祭以昭靈則宜蓋此
壯勇新營實寓藏用微意簡旅嚴衛親不啻期門
羽林寘屯寓農義竊取府兵遺法惟奇正合變之
妙雖無常形而進退坐作之機別有所受是以壁

壘精彩煥乎旌旗文章前赤後黑右白左蒼即黃
帝尉繚之訣象六建七置九司五通周禮管子之
謨一麾開日月之光金神戒路再拂動風雲之想
劒幕生涼號令既申吉日維已豎為門張為寨不
赫其神辨乃色視乃方用康厥祀郊原霜薄繡脚
微搖海岱天晴戎垣少事克配功於峙燾誕錫休
於橐弓錦幅長新濯江漢之秋浪畫鼓不警迓轉
門之朝暉乃若設施之規量今酌古尚賴保佑之
力偃武修文韎韐肅嚴疇敢譁而敢動星河昭朗
宜時鷺而時歆

咸鏡平安兩道厲祭文

厲生於荒先儒有云隔并荐臻困麓今殫施舍已
責尚懼不鋪孰為命吏俾民卒瘁恬彼磬懸恣乃
箕歛乖疹菜色薰成疾焰方歌谷糴復嬰饑索井

李野鼠亦難匍匐道殣慘目遺孩啼飢人實不職

神寧忍斯念我關北

王迹攸起

關西則念我西土東國之紀

一夫不獲九重之恥

關西則千里提封八教從起

惠屢寬徭才

輒補任矧聞填壑錦王其甘天心愛人人君奉天
招弭後除本欲導宣梁嘯何物郊燐何鬼微雨踈
星休爾噓唏崇壇初屹孤魂有托庶解蘊結醉飽

之夕

錦城都尉朴明源致祭文

昨年今日予過公廬今年昨日公碑予書曾幾何
矣人事乃如即遠有期數宵才餘公乎奚憾予則
縈獻

元子定號後告由文

有恤 太室皇矣 祖宗佑我子孫綏我家邦繼
序在今申錫無疆燕祺降歆虹瑞示祥是年庚戌
自古生聖不遲不夙伊誰眷命禮倣見郊聲則中
律諏吉告由粵在七日

右 宗廟

粵瞻後殿 四祖肇饗有儼昭穆於休 陟降默
佑冥隲如式如期裕予小子俾昌而熾溱溱弗祿
孰大祚胤吉庚叶聖前星耀文荷天之寵寔藉
前庥定號飾慶先告厥由

右 永寧殿

幾載心祝今日天從甲觀瑞節矧符 慈宮福龍
珠丘侯松侯柏卜世卜年婉周八百降監無遠悅
豫在上可期而待先告景貺

右 景慕宮

有慶告 社為社司國今予之慶自天胤錫其胤
維何雖小元子大見民情巷舞街蹈位號早定邦
籙彌堅曷不遍告嘉與同歡穀朝于差佾官致虔
庶垂陰騭保佑於千

右 社稷

大院君奉祀孫登科日告祭文

誕惟毓慶潛德上升篤生 聖人不顯丕承迺眷
宗國是年大慶際茲胄裔虎榜名炳始有之幸歡
均公私法部洞尊敢陳蕪辭

東關王廟修改告由文

令辰芬苾兼告繕葺簫鼓在庭洋洋如覲

元陵親祭文

寧考陟降保佑於千其祥長發錫我瓜繇重重叶
吉誕辰誕年泰山磐石國勢永堅虔告新慶我
祀潔蠲洋洋孔邇保佑於千

文貞公金燿致祭文

鼎呂於國繫惟儒相匪躬素履屈拇令望臯不見
齒光又撫背端委立朝懇懇忠愛進憂退亦髮皓
心赤卿兮全歸城西弊屋屢牘斬批豈薄于卿謚
不盡意二字文貞讜議骯髒視彼良史慰予懷者

胤子式似

奉朝賀趙暉致祭文

恥韋以弦惡圓而方何須中竅是廼砭育勇脫名
韁其髮未白有酒澆胃渭清涇濁款款披腔尚記
老成力貧 珠丘筆壽桓楹隱卒百言瀉心一聾
聖言云遠誰取猶者

毓祥宮再回晬辰親行冬享祭文

太歲庚戌必生聖賢恭惟 懿德降以是年是年
重屆國有大慶克叶殷禡用新周命翬我基緒于
磐于泰維萬斯年日月星海冬仲之享享以南至

進卜旬前時維誕彌緣情制禮自我 寧王我來
告喜百福是將

贈領議政崔孝元致祭文

是歲月日夙將 宮祀再周晬甲一遵 先志淑
德徽範緬懷所自致侑之禮記昔仰覲磐泰有慶
想同此樂靈其來歆有洞我爵

六臣祠致祭文

辛亥

嗟嗟六臣言不忍詳身化碧瘞氣干赤陽翼我
端廟左右雲鄉蓁蓁百粵清泠之傍東風蜀魄夜
月蒼茫古誰與儔嗤齊羞黃謠符玄鳥心似蘋魴

如斗沸血撐腔拄腸百死不辭只知倫綱命固有
歸謀豈不臧猗直學士若薇垣郎暨節制使靖獻
先王 先王曰咨胥克以匡輔于冲人若虞若唐
或桡于船或縲于裳金鑾豹直王漏未央厭厭夜
飲有棗有觴僉拜曰都指天蒼蒼維臣等在敢不
式敷死以繼之臣有寸鎡元年癸酉竝武翺翔冠
冕劒珮鳳池虎廟大厥聲施雲風合章變出一瞬
萬事倉皇北辰移躔南巡遼荒嗚呼曷歸世界滄
桑誰畫麒麟拚此曩常有浪滔滔我手之防惟衢
戎戎我目之張烈火燎原肚鐵彌剛志決取熊義

甘蹈湯頰視隊行駭鹿動勸爾衣之錦爾食之梁
先王王音寧爾乃忘矯首望美疊嶂層岡六人含
笑七尺捐長聖祖尚之華褒煒煌繫亦無奈遂
就其芳攜手駢命白日無光飛隼擊殿燬炎墜霜
逃周二子殉秦三良歷千百載風烈愈彰睹彼江
干載屹斧堂森森老柏閱劫猶強曰古忠臣於是
乎藏樵牧躑躅行路徊徨列朝封植勿夷勿傷
逮于肅祖大節其揚死而不死毅魄徜徉徜徉
何之有陵曰莊恨結蒼梧淚灑翠篁風馬雲旂
蜿蜿颺颺敷衽以蔽于帝之閭壽我福我佑我東

方蹕路夙戒于鷺之梁有儼其祠萬代瞻昂我肴
既潔我酒斯香嗟嗟六臣其來一嘗

四忠祠致祭文

皇祖膺命天惟眷 聖德叶重輪太陽之景如日
初升義馭先騁斗血披赤尺䟽奮勁忍說鍛織刀
鋸海嶺身殞國安惟義是秉廟貌孔碩于漢之永
觀者歎咨遺像肅整旌異之典在予彌盛覲 園
之路式間致敬精靈如在增我嗟哽恩酌侑文具
位爾儆

鷺江書院致祭文

彼江一曲云誰之祠父老指點士林嗟咨 聖祖
有臣烈日其光遂我秉執扶我倫綱尺䟽排闥曰
臣是製義有不愧心所自誓百辟動容死猶不死
觀於成就想其操履余服之媿余佩之潔歲暮相
期耐茲高節尚餘正氣挺為穹松肅然以風屹于
大冬龍旂戒路廟額入矚湖山晶晶緬焉如覲地
連六墓院隣四忠侔官致侑所思不窮

唐城府夫人致祭文

自適于館恰三十年黃裳元吉比諧瑟絃瑟絃比
諧萬事皆圓嗣胄一命渙誥是宣靈兮奚憾漬辭

侑筵

和柔翁主致祭文

顯顯令姑于祿將之施及來承厥有蘭芝嘉兒佩
綬維南之為爰奉祠版豐享以時百年罕覩莫盛
於茲都尉銜命躬宣侑詞靈爽如在庶傾我卮

靖敏公鄭弘淳遷窆日致祭文

亭亭不羣棘棘不阿求之今世孰如卿多作事必
牢進言則箴東園一著感在中心績留泉府勞著
巖廊發嘆臨朝而久不忘玄和復出延劒將合悅
若騎箕重惜失楫有司庀儀寔遵典禮表予意者

辦香酌醴

安平大君瑤致祭文

翩翩公子必數勝歌三千珠履雞狗之傑豈如吾
宗襲禮蹈經純行鎮安至德二寧邈矣高節公又
愷悌 英陵之子 文宗之弟 端廟叔父曷不
煒煌好古如德樂善如蒼顏筋柳骨名達 皇明
將翺將翔維翰維城火烈崑岡玉葉其焚台扉禍
作湖亭血殷 黃屋安否一身遑恤精靈上薄冷
浦波咽牙琴絃絕謝局棋散零珠斷幅留與後翫
穉孫將祿美謚先錫起予曠感酌以洞酌

錦城大君瑜致祭文

讀魯陵誌不涕非人死六生六為臣盡臣奮于
宗英錦城烈烈魯衛之親夷齊之節投荒賦鵬大
嶺之南黃昏望義百越巉巖珊瑚長纓鹿盧短綬
誰我從者與之偕作太守嚮慕有甲藏曾灑血為
書月晦星蒙禍迫速獄變起屬垣非昧曆數只知
吾君整衣拜訣不西而東始起於義竟死於忠
鳥叫望帝草綠王孫嗚嗚竹溪長繞雲旂來汝苗
裔待而紳簪侑此一酌愧彼貳心

和義君璵致祭文

王室懿親恩渥汪濊滄桑百變富貴自在卿乃特
立昭揭彞倫指天誓地取義成仁 魯山吾君錦
城吾兄醉琴梅竹亦吾友生鴻毛禹鼎有時輕重
蹈刃如砥賁育之勇挈手僅命棟萼輝暎忠於所
事死得其正歸拜雲鄉有臣曰瓔垂之青史萬代
令名曷以慰之錄後萸萸沱花起滅彼何為者

漢南君琰致祭文

維南有漢朝宗于粵出自天潢名不負實虞舜巡
野屈平懷沙美人一隔地角天涯河山宛在鐘簾
不移孤裘寶玦非乏明時可耐寸赤長結 故君

魂隨去鴻目斷征雲阿兄阿弟視死如歸白粲城
朝生亦支離咸陽片土畢命得所同志同傳謹甫
之侶母爵子謚譜列于璿今者致酹蓋出述先

莊陵祭文

端廟真遊三百春秋紅女農夫語到涕流孰使之
然彞性攸同太歲丁丑王在在東東人稽首袞
衣繡裳翩翩素驂去朝雲鄉曲終仙韶境留靈雨
皺碧咽白巫峽冷浦地是百粵山似九疑讓國巡
野從古於斯鳥啼杜宇人拜漢陵肅祖義起禮
備千乘樹風獎節先朝五紀如其未遑責在小

子金匱考祕紋礎露真翠華如臨丹礪重新循
寢築墀誰其從與宗英文武士林僕御右之左之
悅豫肝饗為赴清明宗伯替享

莊陵配食壇祝文

予即阼之十五年歲次辛亥三月初三日國王遣
臣禮曹判書李致中致脩于安平大君章昭公瑨
錦城大君貞愍公瑜和義君忠景公璵漢南君貞
悼公琰永豐君貞烈公璫判中樞院事李穰禮曹
判書忠莊公權自慎兵曹判書三軍都鎮撫使日
城府院君鄭孝全寧陽尉贈議政府領議政獻愍

公鄭棕礪良府院君判敦寧府事贈領敦寧府事
貞愍公宋珙壽敦寧府判官權完議政府領議政
忠定公皇甫仁議政府左議政忠翼公金宗瑞議
政府右議政忠莊公鄭萃吏曹判書忠貞公閔伸
兵曹判書趙克寬吏曹判書忠毅公金文起都摠
府都摠管贈議政府左贊成忠肅公成勝別雲劔
贈兵曹判書忠剛公朴靖刑曹判書贈議政府左
贊成文愍公朴仲林承政院右承旨贈吏曹判書
忠文公成三問刑曹參判贈吏曹判書忠正公朴
彭年集賢殿直提學贈吏曹判書忠簡公李塏禮

曹參判贈吏曹判書忠烈公河緯地成均館司藝
贈吏曹判書忠景公柳誠源都摠府都摠管贈兵
曹判書忠穆公俞應孚贈司憲府持平河珀議政
府左參贊貞簡公許誦集賢殿副修撰贈弘文館
副提學許慥贈吏曹參判朴季愚順興府使贈吏
曹判書忠莊公李甫欽寧越郡戶長贈工曹參判
嚴興道之神若曰禮禋與享義取配庭餘三十人
炳烺日星嫌遠葛祠就近茅屋相將顧歆每年寒
食一體 君臣上閣下壇萬歲千秋長護玉欄與
癸酉丙子丁丑死事平安道觀察使趙遂良等二

百三十六人從祀之神尚其饗之

義陵莎草石物修改告安祭文

封莎屏石誅吉繕築功既告完敬傳香祝冀垂鑑
隲穰穰降福

康津縣誕報廟修改告由文

時值千清功起一新何以錫之第祿溱溱

贈吏曹判書任城致祭文

菀彼新邑拱于花岡百堵皆興廼理廼壇易知卿
家于邑之始其誰卜之惟卿之子緬卿忠悃想卿
愴喜卿子闡名是地是科豈其偶然理有不差

雲鄉在望家國同休疊疊我思曷云能酬酌以一酌卿其知不

忠憲公徐命善成服日致祭文

義理主人朝廷蓋臣橫縱兇虎奮不恤身維乙之冬危如一髮逆禧匪類敢肆凶毒卿乃忼慨尺疏籲穹陰沴掃北赫日揭東先王曰咨字字腔血擢秩酌禰以代綽楔逮予嗣服其望如歲心膂付畀手足捍衛晉而巖廊為柱為石屢翦奸凶再安宗祏十載協贊副手衣袂便卿調病姑解中書昨臘一面那料奄隔同德之會孰與為樂欲寫隱卒

有淚漬紙節惠以忠咸曰是是頡容永祕仰成無
地不隨而亡一部明義

思陵親祭文

是歲之春 莊陵有事樓尋野燒壇舉酌觶 后
配在天想欣以愴淨業之院峯曰東望其望維何
越岫峻嶒小子今來如拜 莊陵豎碣果阡陪侑
海平錄及其裔為紆微誠冀垂降隲我祀孔明

海平府院君鄭眉壽墓致祭文

文宗自出 端廟之甥存養歿享 后安於卿祔
違野巡瑩寄宅相既 陵而仍蓋取陪葬堂芥長

列聖紀事卷之五十一

二十一

衛陟降無遠年邃古廟澤留塵券賢父配越嗣
孫沾祿匪私于鄭聊爾酬昔一體奠暉象設之側

礪良府院君宋玠壽驪興府夫人閔氏墓致

祭文

礪良墓失傳為壇於府夫人墓傍設祭
用肅廟癸巳故事也府夫人墓癸巳

後又失傳至今年莊陵行義起之禮而墓
地之更尋適在此時事若不偶命道伯堅短
碣於神道置
守塚二戶

九月丁酉祇拜仙陵聖后之思迤及驪興不

須提起萬事滄桑聖祖敷恩厚土回光翮續處

彼牛巒之原為豎短碑且訪孱孫礪良躋享一杯

何許其來同歆既墀而醕

錦平尉朴弼成墓致祭文

寧廟儀賓藹厥名門孰如潘南肫肫其溫清時禁
嚮沁水芳園亦惟東平如麓如墳九耄邵齡 四
朝殊恩展也遐福曾莫與軒 仙寢之東睠茲幽
原蹕路致侑曰我屬尊前後榮酌儻聽斯言

德興大院君墓所祭文

德之積矣祚胤乃錫比彼發源于瀆于岳卜世千
萬繼承 神聖磐輦跼緜莫非流慶載瞻松杉曉
日方升葱蘢佳氣近接 穆陵推以及遠并祀河
東洋洋降福一理感通

河東府院君鄭世虎墓致祭文

天有善報綏以福澤誕厥淑德慶我宗祏家國
相承時萬時億輦路東戒松楸在矚大院崇封
近臣替酌醑以餘思靈其來格

豐原府院君趙顯命遷窆時致祭文

曰惟卿食當我寧王休戚之地與兄翱翔皇極
賁猷澍灘樹勲鼎席盟府霖雨風雲已聞先見不
須提說祀孫世宥表卿姪閔玄和復祕箕騃云邈
棟楫之思聊寄一酌

淑陵曲墻地臺石修改告由文

將始葺理先申告儀遙傳香祝冀垂監茲

故郡守慎弘祚墓致祭文

昔我英考先復顯冊配天有赫介祉无極大哉
聖訓彼纍纍阡俾伐俾墀若思陵然歲月寢邈
草樹傷瞻一區恩賜矧彼偷占怵予小子后志
是追申之定界廼除廼治嗟慎暨成匪遠伊親
陟降怡怡理通神人自茲伊始詔于千億長衛象
設及骨之澤

忠憲公徐命善安葬日致祭文

卿歸湍山匪賴匪洛深局厚土一去冥漠埋却不

得寸丹惺惺佑我邦家為河為星胸臆三改居諸
何速臘初在邇往躅宛昨知卿褒卿子辭無夸情
瀉于酌其來歆些

忠憲公徐命善致祭文

大呂之月維日之三梅綻其萼雪漬于林我有旨
酒孰與燕敖所懷伊人臨湍之臯危乎乙年不冰
而寒豺吼豕突蚓結蛇盤莫嬰其鋒以匡王室煌
煌尺牘卿有熱血手裏綱常膜外死生何天之龍
先王聖明兇醜黜伏國勢鞏寧功邁帶礪忠貫日
星進而公孤百僚為憲乃編明義俾代鐵券予曰

於乎是月是日天理人情允合旌別魯雖銘彞齊
豈忘莒君臣一堂零露漙漙錫名同德其會如期
為寬禮數不醉無歸十餘年所罔或間斷尚記昨
臘笑語衍衍自卿騎箕靡日不思中朝而嗟瞻班
則悲矧逢茲辰有淚盈眚鹿鳴初筵穆叔曾拜南
宮大酒紀信不在人事變嬗繫誰主宰不忍虛度
為卿一斟英靈颯爽其來顧歆三晝悅接一部長
存同予懷者人在靡藩

達城府院君徐宗悌致祭文

嗚呼是日 聖母誕辰光陰迴薄有百其春壬申

花甲小子乃生愛我重我辭溢於情多男之慶萬
年之壽伊祈伊祝山川星斗恩深止慈樂極含
飴中心如結卅載于茲今奉茲辰彌增孺慕誠切
展省三軍宜顧何以寫懷達城故宅積德流慶尚
有沙麓尋源溯根世之不顯嗣孫東帶近侍替奠
聖母之思文亦親綴不昧者靈庶幾來格

鈴原府院君尹壕神道碑建閣後致祭文

有碑在阡麻治之酉繫誰之藏宣陵元舅有刻
其煌晉邸諱號命之閣之畿伯是告匪直也人
有祿有壽之德之學何有之富予讀寶鑑每懷

盛事今因曠典替侑一觴

西平府院君韓浚謙神道碑建閣後致祭文
我家自昔元舅多賢翼翼西平功莫與先文武憲
邦夷險忘軀視師湖嶺龍節虎符以黼以黻奚施
不宜困而愈亨神所勞之文定厥祥維莘之門

龍潛之象驗諸雅言其歸自西朝野環瞻澹如布
韋衆推其謙凡我戚畹宜卿是式蓮城之封表以
穹石 英考置閣 御諱攸載葺而新之責惟予
在百靈呵護顯刻彌光嗣茲千億與國無疆

列聖御製卷之五十一

五十一

列聖御製卷之五十

列聖御製卷之五十一

正宗大王

文

文清公南有容子公轍登第後致祭文

附註
賜祭

教○
壬子

曰予輔養惟兩文清詞苑鼎茵走卒知名有百不
憂向陽喬木轍不與焉如鸞栖棘孟春策士題以
八家華國高手載穀載羅卿子克肖哀然居先主
司舉人宛一庚年是日思卿感在中心肇予云觀
其齒纔三膝抱口授藹然見性勲華洙泗養蒙以

正十年薰德學不迷方 寧考嘉乃八座龍光同
我諭善巧間引年麻宣于廷章回于天垂之汗青
名山石室逮予御極百未償一徵稿弁文祿嗣及
子今日之事天亦助喜鳳毛出苞鵬翅搏風夫人
無恙榮老堂中害行害否致醑禮存彼銜命者徐

文清孫

南輔養官自予三歲時受學而置在膝上誠心訓誨予於文字始知向方即南輔養

嘉惠之功也

先朝屢加寵異至陞資級及其年

至告退也

與朴

諭善並許休致

臨殿同日宣麻

用兩疏

故事錫以

宸章宸翰侈以米布絀帛仍

命撰成

伊日盛舉

為一書活印頒行又藏本于

史庫以

示後此蓋

先朝恩典之出常也予於御

極之後

雖蔭庇其子

若孫此不過為其家祿仕之

意豈可

曰酬其功

今幸其子大闡為其家奇幸不

淺故相

徐志修即

與南輔養同時在輔養官之任

其孫唱第之日遣官致祭今豈可不為乎故奉朝
賀南有容家遣檢校直閣徐榮輔致祭祭文當親
撰以此分付奉朝賀夫人令該曹別
送衣資食物仍令郎官存問草記

永陵親祭文

猗歟 昭考暨我 文母之德之慶小子是受太
歲庚戌乃生元良日降百福滾滾穰穰三載曠省
一念如結履茲濡露豆籩孔潔

洪奉朝賀

鳳漢

墓致祭文

星駕西出時維仲春松杉入望予懷之新 萱暉
不老 寶籌添屋蚤暮祈祝南山北極歌騰重潤
歲膺生聖知荷 陟降積德流慶源尋自出亦靈

列聖集卷之五十一
床暨守也抱子寔公宗嗣惟就與寂皆出而仕冠
帶起居 慈顏瞻喜 親心為心隨處瀉臆大昨
晬辰今日洞酌

錦城都尉朴明源和平貴主墓致祭文

繫我仲姑既賢且淑 寧考愛鍾擇配華族卿膺
貳館美王精金雖雖肅肅以瑟以琴歸妹袂良宮
人尚說曰篤友于左提右挈周旋進退事事腔血
鸞逝鳳藏餘芬未沫歸然魯殿賴耳卿在忠勤款
款恩禮每每拜峯之 阡如灤水齧予不遑寐十
年輜結卿䟽披腹動引程朱睠彼花山有龍含珠

謀及卿士爰契我龜載安載寧吉祥歲蕤錫我祚
胤奠我磐石卿自為國予其諉德名門餘慶萃于
端揆四美咸具百僚是倚坡草再宿感懷交中穹
碑美謚豈曰疇功尺地輦過典刑森森特命卿姪
一酌乃斟

伽倻始祖駕洛國王陵致祭文

氣鍾龜嶽地分雞林燁如神人自天儼臨乃受靈
符金盒紫纓君乎牧乎澤流南瀛田有讓耦屋有
比封于于皞皞赫胥禪通百五十八厥享國年雲
仍得姓以萬以千翼翼堂芥在府之西即祠于傍

春秋首稽如漢拜陵如蜀走臘父老飲燕降福孔
洽肇稱殷禮猗我列朝錫土置丁立墻限樵予
又致醑載屹龜頭寢不如古有司之羞裔孫進言
輦路攬感俾立之監爰及簋糝儀於何倣崇靈崇
德豐功異蹟匹義齊禴神之佑之壽我宗國士
民與樂絃誦耕鑿伽山鬱葱竹島融液洋洋靈鷲
萬世無斁

月城新羅始祖王廟致祭文

維歲壬子春三月十七日丙戌朝鮮國王命守土
之臣備享品如式遣承政院承旨兼內閣檢校直

閣李晚秀敢昭告于新羅始祖王之靈伏以東海
之曲楊山之崖桃花鵝葉邃古齊諧篤生神人六
部辰韓建國斯廬曰居西干六十一年剔第榛荒
戍無警柝野有條桑卜世維千遠軼姬曆明活金
城尚記肇迹猗我列朝崇報罔愆寢安于廟刻
顯于阡顧予曠感翩然是日忸官展忱有洞其爵
謹以牲幣醴齊粢盛庶品式陳明薦尚饗

月城新羅始祖王南解王儒理王婆娑王陵
致祭文

窈窕晏巖五陵之原金鳧王魚升七王園繫次次

雄於焉為宅逮尼斯今亦同其麓皇南竹翠寺北
葉黃雲水俱幻樵牧悲傷嗟竇右風暨錢臨安尚
亦侑之救後人觀矧茲賢聖月出之所任其湮沒
迺若之許亟走官人詔東都尹載胥載省酒潔肴
膳英靈不沫降格于茲壽我福我維億萬斯

王山書院致祭文

挺生間氣繼開邃學不由師承直溯閩洛大人契
合三朝有聖經之緯之禮樂刑政賦鵬西荒鳥
道峒嶙薑辣之性在處動忍肯隨人化炳若忠赤
障川砥柱閱劫炯王公議大定不俟乎百太室

文庶次第配食矧予曠感尤倍是日正道榛蕪異
端猖獗嶠俗獨超儒化之暨山斗著龜朝暮寤寐
承宣銜命王岑之麓引領南望萬懷一酌

陶山書院致祭文

大東元氣養得真儒天人性命孔孟程朱執厥繩
尺正我步趨渾渾姿性進進工夫道不墜地實在
先生 穆陵側席洞開邇英丘園帛賁履絪絪橫
角巾南歸介石之貞維陶有山永矢衡泌口餐杞
菊手披籤帙味哉深造毫縷四七萬人山仰一方
泉達青衿蹈矩紅女知讓仁人利溥太和肝蠻縱

有異端載胥以誑環嶠七十一不迷向是謂鄒魯
繫誰之功觸類伸長如挹高風几校林壑繪素之
中六條十圖請師我公與配食故參判趙穆共饗
之

唐奉常正卿新羅興武公金庾信墓致祭文
猗奉常卿鴻佐羅氏仰天誓山劒氣虹紫宏猷大
略有一無二額額扶蘇悠悠淚水兵不血刃許大
興志唐宗曰嘉畀上卿位垂名字宇宙揭示青史翼
翼勞伐施及孫子月城西阿有此神隧鉅鹿之思
每飯不已金官古陵時適有事公實其胄一體虔

祀歆我牲醴佑我繁祉

永安都尉洪

柱元

貞明公主致祭文

德行之美壽考之隆子孫之繁福祿之豐萬口同
辭貞明文懿積善有慶吉无不利 聖女嬪京五
葉其昌亦粵小子荷佑穰穰流通一理輝暎重輪
受天之祐錫爾之純言觀其家槐陰在庭以公以
私泉醴芝靈義榮出宰維楊之牧牲肥酒馨官厨
不薄載奉祠版肅雖之車四世從之神其樂且遠
報之意茲命承宣永垂嘉庥於萬於千

貞簡公洪

萬容

僉正公洪

重箕

致祭文

故判
書洪

錫輔故奉朝賀洪
象漢同為致祭

永安脚下世德繩繩貞簡父子 慈宮高曾侍郎
不緇立朝著節靖惠趾美位躋崇秩兩胤聯棣鼎
席騷壇大家喬木枝茂根盤兒孫分符地近三倉
五代祠宇同享于官敬真貴主爰及後昆彷彿英
姿來歆洞樽

故判書金漢耆致祭文

維我 聖母華哲勛恭豐功盛烈奠我疆封天高
地厚疇克形容昔卿起跡迺自濯龍虔奉 慈旨
維義是從義之所存不詘而縱孰敢貳我貳則我

攻間者屯邇同人于宗靈其奚憾清酤在鍾

咸興 本宮攝行酌獻禮祝文

興王之地 五聖同宮積德毓慶耆定我東煌煌
樹立茲矢彤弓黑石似礪赤鳥注灋雪峯雙峙顯
顯隆隆卜命於萬 神謨聖功俗薦漆沮義取岐
豐賁申儀文簠簋釜醢吉日遙葢黃流在中降福
孔邇慶我融通

永興 本宮攝行酌獻禮祝文

永興之府順寧之社布濩磅礴左山右野地是興
龍辭則走馬皇矣 烈祖奄有區夏天與人歸格

于上下夙猗緜緜頌騰周雅 聖繼神承熙也皞
也是地是享盖有取者辦香齋誠宗伯奉罍臨止
洋洋俾熾繁嘏

永興 濬源殿攝行酌獻禮祝文

誕彌舊里萬年儲祥地比歸州儀同完鄉 日表
天臨衮衣黼裳肇定大命長留 耿光自 宮徂
殿申薦珪璋吉蠲馨香降福洋洋

錦城都尉朴明源禪祭日致祭文

誅不盡言碑不盡意欲忘未忘豈直親懿倏焉而
禪典型則那身歸雲霄功在邦家佑我昌熾寸心

如丹何以瀉意嗣孫拜官

淮陽義館嶺祠致祭文

崑彼高山鎮我東紀神之庇之迺有美利有龜鬻
弦尚稽往史剡剡上下控衛萬禩維萬及億維普
厥施壽我福我歆我泂解

淮陽德津溟祠致祭文

交州之西大江揚靈魚龍為宅滅貊為屏流澤汪
汪東國以寧秩秩祀典一視四溟祥風瑞雨載毒
載亭佑予繁祉濶毛時馨

水原禿城山城修改時告土神文

嶽不必鉅壙不必崇為鎮為翰靈在其中環山百
雉上應橈槍龍蛇奇績孰如禿城矧茲拱護密邇
珠丘昔方於楚今豐于周而時出之佳氣祥雲如
朝如覲肝嚮氤氲築之登登始于中唐峙乃楨榦
屹彼金湯肇稱脩典羊一豕一於千萬年永垂冥
薦

贈兵曹判書諸洙宣謚旌墓日致祭文

地靈挺傑大嶺之右翼虎與倫卧龍有後提我義
旅奮于蠱石截彼江淮障如山岳鑒之星野諭使
曰能王錫其誥逋假而陞大礮衝空誓天嬰城

蚍蜉援絕熊魚義成維李忠武暨郭將軍草木皆
知婦孺亦聞誰之不如事與名翳一抔荒山時有
光恠公館脩竹客有還者無曰不經理或然也賢
哉阿戎不媿乃叔六載蹈難一體殉國死猶不死
尺劒在手烈烈雙忠天長地久維歲月七夙拜
北壇推予愼歎記卿忠丹偶晦者迹彌顯者節既
晦而顯若須今日迺詢方伯迺命太史大書特書
雙忠之址氣蟠穹旻衛吾藩服鞭虬駕風其永無
斃

領中樞府事李福源成服日致祭文

已則精白人無雌黃隱卒一評莫如予詳既恬且
約素履也堅公退手卷簾几蕭然胄筵鼎席知卿
用卿終始周旋文清文貞六世三傳大硯之石一
家四登奎章之閣望隆坐鎮皓髮垂垂頻年輟眷
卿又何之睠言寫懷有酒斯馨庭蘭齊秀佇尋典
型

誕報廟致祭文

廟於天下譬在地水左海蓁蓁亦不我鄙赤駒蒼
鐔鎮于南東慕忠服義九州攸同之恩之德箕封
若偏地雖去萬歲雖過千恭惟顯聖島夷破膽乃

安斯土有叩必感壽而福而繇我瓜瓞環以中外
享祀非一於赫神威最著此地金扁焜煌二字以
識曠世下風陳李之祠或仗皇威或濟舟師豐
功偉烈一體隣近一夕廟門風烈潮憤禮有未遑
鄧乃追躋人居伯仲澤均黔黎王實臨止在宜攸
許山河氣肅告儀是舉英靈毅魄悅侍左右申錫
冥庥俾爾孔厚

鄧搃兵子龍追配康津縣陳都督祠致祭文
壬辰之役水陸訇訇陸有提督水有搃兵搃兵伊
誰廣東之傑揭陽羅定有奕威伐添注神機七營

參將龍驤東海萬夫之長曰麻曰劉暨董僉事蠶
馬季張赤羽其幟堂堂我旅萬有三千蹴之關山
颿若垂天逐北謹叫爰帥統制一碧層溟妖氛迅
霽始公東來茫焉風沙及公之歸翳然桑麻海隅
黎庶同我婦子簞食壺漿將于路左咸曰將軍繫
我父母公乃逡巡歸之不有彼海之曲厥有遺廟
日月所出萬古竝耀後二百年迺躋鄧公滔滔江
漢亦流于東如水其靈曷不戾止佑我福我千載
億祀

右陳都督璘

桓桓將軍躬蹈大難姓憶南陽名符常山敦詩說
禮餘事翰墨樟鎮銅鼓苗蠻迺服攄我甲藏摺彼
丁改孰敢嬰者四曠氛翳倭奴匪茹瞰茲東隅剡
釜剗萊熿嶺燬湖 帝曰咨汝副摠兵官汝救屬
國如吾邊關公拜稽首投袂而起誓衆滄海舳舻
千里矍鑠哉翁氣蓋溟碣露梁夜潮赤毳迺迺沙
蒼一圍燭龍掀風水神河伯後先艫艫南船頓足
北船其歌公曰首功我不讓多亟提勇夫蹕入東
師并力而前強亦不支火器一擲非戰之故烈焰
所及賁育無補大樹飄零三軍雨泣贈以都督

五聖御集卷之五十一
帝亦於邑千秋南海尚有怒濤峒獠溪獮戢矢爭
逃於乎偉績莫與為侶漠然高濤安靈无所惟予
夙欽鉅鹿餘思升而享之于陳之祠酌以斗酒庭
有饒筯永衛我服氣作山河

右鄧總兵子龍

大亂之肇人為時出晟奠唐社葛復漢室後千百
載合為一人以靖島氛時在壬辰名聞天朝

帝曰嘉乃王節金章壁壘增彩下拜受命鯨海千
疊舟舠龜轉礮吼虎裂碧波閑山一瞥則踢都督
有書我覘乾象視彼河魁應在統制北有大斗盍

禳而祭卿且拚命旌旆入雲火起中流及鄧將軍
竝櫓而馳有去無歸海國魚龍尚驚餘威睠言遺
祠在水一方謳吟下招有此巫陽酒澠肴陵悉醉
悉飽大江揚靈滌彼蠻獠

右忠武公李舜臣

駱參將尚志追配武烈祠致祭文

維昔壬辰控于大邦 帝詢文武廼理鴨江謀夫
如雲發言盈庭司馬曰臣夙諳倭情可以智取不
可以力以戰以和勿徐而亟于時東使冠蓋如織
魏無信陵齊急即墨馬雖不汗發縱則公一言之

重奠我海東海東士女願言家祝淚水之漬有堂
翼翼公像在堂肅清以高颯爽其姿蓋世人豪誰
其侑之曰四將軍暨今追配維駱千斤蔽我牲醴
用責厥儀穀日其朝髣髴雲旗

右石尚書星

猗我忠烈家世元戎武臣提督其始自公濯濯厥
靈載之青丘花衣夾道風月有樓露甲西城大礮
星撒魚駭鳥竄遂還所失欲報之功深淺海水海
有窮時報豈可已遺裔東投世有緋王靈應在茲
歆我尊醑

右李提督如松

倭燹之烈最帶方州時有不幸非公之羞倉皇西
門餘五十騎何論成敗所取者義試看普通賊亦
無奈志決身殲一死難貸燐火空青雲水俱白曠
世之感若晨之隔練日其良潔此豆鉶穆將愉兮
賓赫戲靈

右楊總兵元

我思昧昧寧遠之子太保之弟天下勇士密雲黃
花旗燾所住首挈偏師唾手東渡碧蹄館下月黑
鴈高奮前殊死介馬以鏖累累其馘百六十餘緬

彼雄風寶山之墟古廟丹青宛如酣戰酌以明水
庶被英盼

右李總兵如柏

東征諸公如鷹斯揚曰右協帥堂堂乎張訓忠應
迪牧芳燧心咸受節制壯我韜鈴七星縣靡砲碎
而發蠹茲小醜魄褫魂奪平壤既復崧京乃又今
而後者敢肆不諛維我駱公昔公戲下作主侑食
有酒斟酌

右張總兵世爵

數戰之功輒先登鄭義發弘楚誇偏乘不為之

先大功安集猗駱參將蔚有虎力元帥莅衆孰敢
先者萬夫如堵應募曰我尺劒賈勇遂登危譙千
仞不測聳若盤雕浙兵從之鼓鳴不已紅白其旂
隨風以靡是公之膚公實其魁為萬人敵詎一將
才藩臣有言概予之衷是地是祠曷不我公廼選
令朝廼陞明享維億萬年報應如響

右駱參將尚志

道峯書院致祭文

是歲壬子之重陽翌朝為謁 光陵路出先正文
正公趙光祖宋時烈祠前還途遣近侍侑祭兩賢

其文曰壁立之峯如觀靜尤志在堯舜義炳陽秋
地與人遭兩賢一院曠世之想殺觴是觴

和協貴主墓致祭文

於乎我姑曷不賢淑友于盛德慣聞於昔漢水之
阡珩珮攸藏駕過一舍綴辭替觴

恩信君禔墓致祭文

嗟予弟兮公子麟趾予懷予述刻之玄隧駕過維
楊益勞予思靈其有知庶傾茲解

禿城山城修改後城隍告由文

諏日之吉迺營疆理迺告厥成百粢千雉地以增

重儼若大都維萬斯年壯我鴻圖

靖憲公趙榮國宣謚日致祭文

傳亞於師望隆講院先王則哲卿膺是揀人稱
練達予嘉簡當不亢不徇穩步康莊名登放卜跡
阻文苑兩世曳履不食者遠寬樂令終博聞多能
欲知卿也於謚乎徵

忠憲公徐命善致祭文

緬惟同德一悵一嗟遠者可近逝者則那霏霏雪
花亦灑湍岡有酒盈罇不堪獨嘗輪囷之懷無地
可宣詩以賦之郵筒南傳

湖南穀裝運濟州發船日祭海神文

天下之大惟海而已赫赫者靈澤我南紀鵬飛鯨
徙民蒙厓褫不揚不颶清且漣猗島民阻飢望哺
張喉發魯之棠泛秦之舟甍黃粲白厥數萬斛打
鼓掛帆棹夫踴躍龜從筮從咸曰利涉徼惠于神
桴應斯捷朝去暮還北南其風吉蠲之糝以告祝
融

運穀到泊日祭濟州海神文

一點小島號曰瀛洲厥包橘柚厥貢驂騑守臣稽
首奏庶艱食予不遑息立命船粟長腰浙米流脂

燕麥中流舉蓬拏岑咫尺鴻毛助順徯神而蘇家
家炊煙薰面春敷解包言旋有風送颿來如去時
天晴浪恬櫂歌四起擊鮮釃酒水府之賜敢冀前
後

璿源殿酌獻禮祭文

癸丑

猗與那與 肅祖大德享國五紀鞏基萬億弘功
盛烈衣被大東 英考承之若芑于豐 日表天
臨一室兩龕是年是慕 陟降來監

右一室

稽昔甲戌太歲維百何歲非慕是歲采雩元正祗

拜若問 寢晨來庭皓髮亦多耆臣入戶周旋
真容孔邇黃流在卣降以繁祉

右二室

提學吳載純致祭文

卓稱寬中周誦訥言予見於卿今世古人跡遠標
榜口絕忌忮是有譽處華撫自至睠彼名扁曰愚
不及卿去若仙頎容難接

尚州忠臣義士壇致祭文

壬辰之役嶺首冠獬剔釜夷萊士馬俱殫廼命元
帥作之屏蔽市井無賴厘以百計沙伐之野甌水

之滋陣雲四塞草樹晻翳鄭門不發宋甲潛曳惟
三從事矢以身弊猗文烈公有赫其勩殷契周稷
正我宗系光國志慶錫爾帶礪若騎曹郎出為
兄替暨直學士蜚英妙歲三人曰噫仗劒投袂不
死匪夫誰其狗彘披赤以奮化碧而逝先倡之節
八方爭繼顧予愾欽不以曠世壇扁嘉號立愷日
祭氣作山河南服永衛

奉朝賀南有容致祭文

記昔摹真卿實相役卿子緋王亦由工祝前戊
後癸世濟其美侑我師餽香酒旨貞敬花甲適

丁此時官備燕需寔卿之恩

忠武公李舜臣致祭文

請量南溟 帝恩盈盈纖塵不動戰艦自橫孰仗
天威永奠東土膺期而出曰有忠武昔者豕突列
郡解尾灑涕擊楫卿時士雅一鼓殲酋賀酒將醺
單車來代卿時望諸拾燼裹創再按淮浙壁壘增
彩卿時光弼鐘簴不改士女相慶天生為社卿時
李晟偕我王師夬擣巢穴忍說五丈嗚呼諸葛維
牙之阡楸柏青青篆首紀常吁嗟武寧卿有所受
萬曆天子旗章璽票鎮伏南紀都督舊渥上相新

榮隰苓之思亦酌於卿

忠憲公徐命善致祭文

睠彼湍阡木葉再脫日月寢遠我思如一筵几撤
矣典型祕矣披來明義卿在卷裏危身之忠扶
社之功予何多誥萬口之公屈指年紀行將七十
胡不少延名題耆帖箕精夏漠槐陰淒清寄意錄
孤勗以家聲

直提學朴祐源致祭文

所取於卿謙畏拙約受知藝苑進步內閣只按三
節纔陞八座飛不盡翰何遽歸些種種情事豈必

多譚酌以一杯聊慰卿心

忠憲公徐命善致祭文

維臘之三今又來思人則不見日則如期翩翩雪
花亦灑湍阡何以寫懷搃帥登筵官卿之子俾守
家傳

洪翼靖公

鳳漢

致祭文

甲寅之歲月正元朝將賀于庭來汝百僚是時
慈宮壽躋六旬周夙頌繇堯莢留春泰平有象吉
慶无疆詒爾多福荷天穰穰緬惟自出亦粵我公
公際 聖明奮厥績庸託以心膺親則肺腑之內

之外以華以膴徹底誠力燁如精神甲兵錢穀事
事經綸手持四節足遍五營投之所向如刃其迎
地部惠局弊去蝟毛盈盈坻京民亦不勞十載秉
軸巨川舟楫彙輯廟謨動溢箱篋默數宰輔指豈
僂貳猗歟福履肇自文懿比漢萬石擬唐郭令善
積有餘於公為盛公齡于今九九箕疇若子孫曾
厥數相伴歲與人增計以萬千在國振振在家緜
緜公將是福佑我 慈宮慈宮有之爰及予躬前
星耀彩南極添光俾熾而昌滾滾天潢貞敬捆範
寔公賢配醴泉靈芝遐不深溉為選良辰同奠苾

芬 慈宮之思小子之文事不偶爾奚待明年公
歸福留其至如川

慕堂洪文敬公

履祥

曹孫大闡遣元輔洪樂

性致祭文

我外氏顯肇自慕堂栗老所舉經術文章 慈宮
有慶萱草長春福履之源若古塗莘是時公家曹
孫大闡積善之餘俾厚俾戩二百年所節惠始宣
久而彌彰若有待然爰命元輔敬奠洞酌外內雲
仍并錫爾福

文簡公李天輔致祭文

大東喬木先數延李卿居鼎鼐國耳公耳膜外身
家文忠與歸庭奏殿叫安危之幾發之於詩遺編
炳若藻被江山功留社稷為善必報可質蒼穹
一子三壻袞袞登庸庭槐餘蔭又及孫子擢名進
前一愴一喜欲表予思豈踰今日仙樂前導亦有
芬苾

海昌尉吳泰周明安公主文穆公吳璦文靖
公吳載純致祭文

勤學好問恭己鮮言名符于實可驗輿論日月幾
何大硯傳新載瞻閣館恍若隔晨節惠同時曷不

萬聖御集卷之五十一
歲黹并侑祖廟一舉三庀

鰲興府院君金漢耆致祭文

天佑 東朝瑞日亭午何以畀之大衍其數時千
時萬誕受自今含飴樂多祝斗誠深予欲表章曷
不溯源翼翼忠憲積慶之門篤生任姒永奠 宗
祏凝重之姿謹畏之德迭長戎垣為國幹楨戒遵
濯龍居寵若驚往事何言運有平陂所秉者義惟
予燭知是日飾喜 慈心為心特擢卿弟次月衛
銜文以瀉之出自悃悞卿靈如水來歆斯酌

清風府院君金佑明致祭文

周曰姜嫄宋曰堯舜 太母如之東海為準 聖
繼神承彌億萬春若芝有本若醴有源大成為祖
文貞為父仁厚基址謹約規撫之柱之石邦家之
恃遺風剝馥施及孫子再聯王室翟禕斯煌國本
磐泰吉慶無疆是時稀年廼見公家於人為瑞光
動曾沙敦府新誥用替西樓三世竝侑有觴其觶
判敦寧府事金聖應致祭文

丈人之古求福豈弟清風之孫清原之禰仲弓高
年值茲慶會將事者誰赫赫犀帶

清原府院君金時默致祭文

元舅之宅又出元舅積善之徵受祿且厚視之如
卿令弟歸然矍鑠是翁古稀其年彼園者王何讓
耆帖報喜於卿恩禮孔洽

延興府院君金悌男光山府夫人盧氏致祭

文 甲寅

緬惟公家我朝塗莘喜鵲南溟無往不伸舊甲維
癸肆覲東陵沙隨餘慶施及後承才唱金榜旋
侈銀帶是日倅來元輔外裔

錦城尉朴明源致祭文

坡麓之草於焉五宿時對判府為話夙昔欲求典

型何論貴賤置之檢書不待掄揀今見一子又登
虎榜賜樂授官聊示嘉獎是亦科慶卿必解頤志
喜志感有酒盈卮

文忠公柳成龍致祭文

煌煌彞鼎太常則有銘以紀之曰文忠柳與彼石
鼓暨厥麟閣休美齊匹百代不泐 宣廟中興卿
食其當奔奏禦侮在西一方以籌以勦盡乃心力
龍馭載返鯨波永息功垂晉乘名重趙呂咸誦西
崖農夫紅女世世錄後襲爵佩紱近閱遺集筵燭
屢跋最犁然者城壕方略是時兩孫金榜聯擢喬

石渠寶笈卷之五十一
木之蔭翰園騎郎維星有箕若接精光鹽梅舟楫
輒起曠想馳命嶠南予酌卿饗

文貞公金墳墓致祭文

歷數賢輔倭先潛翁士女謳吟曰維大同積善之
慶于私于公元帥仍孫有酒載豐

清風府院君金佑明德恩府夫人宋氏墓致
祭文

世世將相壽春之麓曾沙叶吉佑我 宗國宗國
之福派與聯戚誰其將命有煌犀王

慶恩府院君金柱臣致祭文

沙隨毓慶誕屆 虹節昨拜 仙寢躬葢清苾遂
及我公侑我壺觴不顯亦世介孫金章

耽羅船粟時祭南海神文

天一地二中圻南溟鵬飛鯨徙濯濯厥靈來往如
梭巨艦輕舳橘薦于 廟馬騰於槽邦人稽首咸
曰神惠秩祀無斁歲走牲幣大塊噓籟瘁我島穡
十月泛舟龍驤萬斛纖豪可數鏡水無風指月與
星踴躍梢工朝天館前包解困坻如往而復一日
千里祝冊曰某予敢不敬徵神以誠鬣剛酒聖疇
昔之佑其在于今瀛岑壽曜永見晴嵐

忠定公趙鼎遷窆日致祭文

吁嗟忠定行純節卓以知之深其思也篤湍山暮
雪復藏賢相於焉八載箕宿蒼茫兒今沾祿果碩
馥剝有酒三酹吁嗟忠定

文忠公李廷龜致祭文

解語童穉皆誦月沙德望東國姓名中華愷悌君
子厥後孔奕儀兩卦八衍至千億外內雲仍王謝
甲乙無量多福有源自出賢尉克似慈宮誕膺
惠于王家滾滾繩繩同慶之歲報本之衷既酹文
敬敢後文忠松楸之側丞相祠堂何以佑我載錫

熾昌

文肅公李性源內閣待教李崑秀致祭文

文忠脚下得卿父子國之良輔家之拂士官尊鼎
鼐地近奎壁思則併思惜則同惜卿子遺稿卿實
哀取卿受節惠卿子知否駱西故宅喬木亭亭宛
爾如見父子典型

列聖御製卷之五十一

